

Sabiduria di bida y nostalgia den obranan di Digna Lacle

Nos ta den e simannan cu buki ta hunga un papel importante. Especialmente e Siman di buki cu ta na caminda.

Algun día pasa mi a skirbi di e bunita buki di **Sr. Sherwin Jacobs** y mi a skirbi tambe di e buki "**Ki mishi bo na cai?**" cu ta wordo presenta awe nochí na **Arubiana den Bachstraat**, di e autor **Sr. Frank Williams**.

Esaki ta un obra teatral masha interesante pa lesa pero lo ta masha interesante tambe pa mira riba escenario despues.

Te ainda colega Yorlenny no a contesta mi si e por traha pa mi awe nochí pa mi por ta presente na presentacion di e obra di **Sr. Frank Williams**.

Si mi no logra mi lo ta na Van Dorp mañan entre 11 or y 1 or unda **Sr. Williams** lo ta presente y cu firmamento di bukinan.

TRECE "NOS" PASCO BEK

Un siman pasa tabata tin presentacion di 3 buki di **Sra. Digna Lacle Herrera** den cura di **Arubiana**.

A presenta "**Buki di Pasco**" cu storianan di Pasco, poemanan y tambe canticanan di Pasco, ademas paginanan pa mucha kleur.

Loke mi a gusta den e storianan di Pasco ta con **Sra. Digna** a relata di e celebracion di Pasco di e temponan aya.

Lagami gaña bisa, "**tempo di mi mama y wela**", pa mi no duna mi edad.

Bo ta sinti con e celebracion di **Nos Pasco** di antes a bay perdi y ta haya gana di sclama, "**trece Pasco bek!**"

E hobennan di 15 pa 40 aña di edad por lesa y siña di e celebracion berdadero di Pasco cu nos tabata tin.

No solamente di Pasco pero tambe Aña nobo.

Bo ta lesa y keda cu gana di sigui lesa mas.

E audiencia e anochi aki tabata den un ambiente completo di Pasco, cu e canticanan di Pasco, cu coro **Tutifrutí di Maybeline** a presenta, cu letanan di **Sra. Digna**.

E schets cu e actor y actriznan hoben tambe a yuda crea e ambiente aki.

Mi a lesa e "**Buki di Poesia y Storia**" y a keda encanta cu e poesianan pa mucha.

Bunita tabata cu 9 di e 12 nan tabata basa riba nos bestianan, y con por converti cada un den un storia pa mucha (cu ainda no por lesa)..

E storianan bunita ta den e seccion di "**Aventuranan di Anita**", sigui mes ora cu e **Travesuranan di Pedrito y Wancito**.

Mi a sinta lesa esakinan manera un mucha cu pa prome biaha ta lesa un buki cu storia y gozando manera un mucha, di cada un.

Loke mi a gusta un mundo ta e "**Kopchi di recuerdo**".

Ora mi a mira e buki, prome cos cu mi a ripara ta e "**baul**" riba e kaft.

Ta **Sr. Frank Williams** den su presentacion como maestro di ceremonia a relata di e "**kopchi**" cu mi a ripara cu e "**kopchi**" no ta e "**baul**" sino e "**caha**" di prendanan.

Tambe cu e prendanan den e "**kopchi**" aki ta e experiencianan cu **Sra. Digna** a relata den su 3 storianan.

El a cuminsa cu "**Shi Pilonia**", e persona religioso cu a pone mi pensa mesora riba e cantidad di "**Shi Pilonia**" cu mi a yega di conoce y cu awe ta masha poco "**Shi**" mi conoce.

Mi a pensa riba e pakico tabata yama e personanan aki cu e título "**Shi**", y **Sra. Digna** mes ta menciona den e recuerdo aki: "**Semper mi tabata puntra mi mes ta na ki momento nos pueblo tabata haya un persona digno di por a carga e título di "Shi".**"

E "**Pandushi di omo Denchi**" mi a lesa cu smaak pero loke a manda mi tanto aña atras tabata e preparacion pa Pasco.

Aki no tabata e pan dushi cu ta parti di recuerdonan di e autor, pero pa mi e "**verfmento di cas, blancha cas, drecha tur bentana y porta, y manera e obra ta menciona, e holo di verf, vernis, huli, linoleo nobo riba vloer.**"

Ki bunita tabata "**Dos alma Simpel**".

E figuranan den e storia di recuerdo aki ta ponemi pensa riba e tanto "**Buchi Calo**" y "**Ma Richi**" cu mi a conoce tempo mi tabata mucha y kier a sinta cu nan djis pa mira con **Buchi Calo** ta chupa su pipa y **Ma Richi** ta huma su cigaría candela paden y tira e cabito den bleki cu e ta usa como cenicero.

Sra. Digna a cordami riba e stoof di kerosin, e "**ijsbox**" cu tabata otro number pa frishider y e "**orenchi**".

E refresco tabata e **orenchi** pero despues nos a cuminsa pidi pa "**orenchi cora**" tambe.

El a trece mi bek na e cashi di bleki di buscuchi, kopi cu glas y skotter pa kopi y glas.

E parti final di e storia cu e cumpramento di catochi tambe a pone mi mente bay atras tanto decenas di aña cu bendedora tabata tin su buki di catochi y den dje ta pone number tras di e numbernan.

Coco cu a yega cu auto y "**bon tira**", a pone mi corda e bendedora cu a yega na bon placa cu bendemento di catochi y kendenan a bira experto na conseha bo pa cumpra cierto number e dia ey mescos cu "**Coco ta studia e numbernan cu masha interes**".

Finalmente anochi riba cama bo ta corda cu bo no a "**bolter**" e numbernan.

E "**Buki di poesia y Storia**" sigur ta un di e hoyanan cu **Sra. Digna** a saca for di su **kopchi** y cu mi ta recomenda tur hende.

HOPI A SIÑA KICO TA HAIKU

E parti final di presentacion di buki tabata ora cu a regala tur presente un buki di **Haiku**.

Tur esnan cu no tabata sa kico ta **Haiku** awor si por bisa cu nan a haya sa.

E prologo mes ta splicabo cu **Haiku ta un forma di poesia hapones**. Un poema ta consisti di tres regel.

E prome regel tin **5 silaba**, e di dos regel tin **7 silaba** y e di 3 regel tin **5 silaba**.

Na momento di skirbi esaki colega Frenk a bin sinta cerca mi y mi a pase e buki di **Haiku**.

El a bisami cu ta facil.

Ora m'a bise cu si e ta facil, traha un **Haiku**, el a contesta: "**mi'n tin inspiracion awor**".

Mi no sa con esaki a sali, pero diripiente mi di cune:

Hai-ku ta fa-cil === Mi a ha-ci es-fuer-zo === E ta di-fi-cil

Ora el a bisami: "**Ata bo por!**" mi a skirbi:

Ma stop di fei-ta === ye wo-wo-nan den spil == no a dis-par-ce.

Ta hopi mi tin cu practica pa trece algo di sabiduria di bida den un **Haiku** y pa trata na skirbi **Haiku** bunita manera **Sra. Digna** si por: "**Fra-ca-so tam-be === ta ha-ci bo ri-co den === bo ex-pe-rien-cia.**"

Sra. Digna, danki pa tur e recuerdonan cu nos a haya den bo obranan y e sabiduria den bo haikunan.

Juby Naar